

दिनांक 21.07.2025
 समय: 18.45 बजे
 आकाशवाणी जयपुर—अजमेर
 प्रादेशिक समाचार

- संसद रो पावस सत्र सुरू व्हयो—प्रधानमंत्री नरेन्द्र मोदी सत्र रे सार्थक अर सकारात्मक चर्चा ऊं भरपूर व्हेवण री आस जताई।
- जस्टिस के.आर श्रीराम राजस्थान हाईकोर्ट रा मुख्य न्यायाधीश रा तौर ऊं शपथ लीनी।
- खान विभाग चालू माली साल मांय हाल तांई कोई अढाई हजार करोड़ रुपया री कमाई कीनी।
- प्रदेश रा घणखर हलकां मांय ई चौमासा मांय हाल तांई असामान्य बरसात —बंधा अर तळावां मांय 68 फीसदी तांई पाणी भर्यो।

संसद रो पावस सत्र आज लोकसभा अध्यक्ष ओम बिरला रा सम्बोधन सागे सुरू व्हयो। ई पाछे विपक्ष रा सदस्या री नारेबाजी रे कारण सदन री कार्यवाही दो दफा टालणी पडी। विपक्ष रा सदस्य पहलगाम आतंकी हमला अर बिहार मांय वोटर लिस्टां रा विशेष गहन पुनरीक्षण अर दूजा मुद्दां माथे चर्चा री मांग करता थकां शोर—शराबो कीनो। सत्र री सुरूआत ऊं पैली प्रधानमंत्री नरेन्द्र मोदी लोकसभा सामी खबरनवीसां सागे बातचीत करता थकां संसद रा पावस सत्र ने विजयोत्सव बतायो। वे कह्यो के ओ सत्र म्हाणी उपलब्धियां रो सांचो उत्सव है। प्रधानमंत्री कह्यो के चौमासो, नवाचार अर नवीकरण री निशाणी है।

श्री मोदी कह्यो के देश मांय मौसम रा हालत अनुकूल बण्योडा है जो खेती—बाड़ी सारू फायदेमंद व्हेवण रा आसार जतावे है। प्रधानमंत्री कह्यो के लारला दस साल शांति अर बरकत रा रह्या।

श्री मोदी पहली दफा अन्तर्राष्ट्रीय स्पेस स्टेशन माथे भारत रो तिरंगो झण्डो लहरावण ने माथो ऊंचो करण रो मौको बतायो। वे ऑपरेशन सिन्दूर चलावण सारू फौज रा हौसला री सराहवणा कीनी। प्रधानमंत्री कह्यो के दुनिया भारत री फौजी ताकत री गवाह बणी। वे कह्यो के ऑपरेशन सिंदूर रे दौरान भारत री फौज कानी ऊं तैय लक्ष्य पूरा सटीक तरीका ऊं हासिल करी ज्यो। प्रधानमंत्री कह्यो के ऑपरेशन सिंदूर रा तैत आतंकवाद रा आकावां ने वां रा ठिकाणा मांय ई खत्म कर दिया ज्या।

प्रधानमंत्री आस जतायी के संसद रो मॉनसून सत्र सार्थक अर सकारात्मक चर्चा ऊं भर्यो व्हेला।

जस्टिस के.आर. श्रीराम आज राजस्थान हाईकोर्ट रा नुवा मुख्य न्यायाधीश रा तौर ऊं शपथ लीनी। राज्यपाल हरिभाऊ बागडे वां ने पद अर गोपनीयता री शपथ दिरायी।

शपथ दिरावण सारू जयपुर रा राजभवन मांय राख्यी ज्या जळसा मांय मुख्यमंत्री भजन लाल शर्मा, विधानसभा अध्यक्ष वासुदेव देवनानी, उपमुख्यमंत्री डॉ. प्रेमचन्द बैरवा, उपमुख्यमंत्री दीया कुमारी अर केई मंत्री, विधायक, राजस्थान रा जज अर वकील मौजूद रह्या।

उपराष्ट्रपति जगदीप धनखड़ रा 23 जुलाई ने जयपुर रो दौरा करण रो कार्यक्रम है। एक दिन रा दौरा रा तैत श्री धनखड़ रियल एस्टेट डवलपर्स संघ केडाई राजस्थान री नुवी चुणी ज्यी कार्यसमिति रा सदस्यां सागे चर्चा करेला। मुख्यमंत्री भजन लाल शर्मा रो ई काल केकड़ी रा दौरा रो कार्यक्रम है। ई दौरान वे विकास रा न्यारा-न्यारा कामां री सरूआत करेला अर पूरा व्ह्या काम जनता ने संपेला। मुख्यमंत्री कृषि उपज मण्डी मांय जनसभा ने ई सम्बोधित करेला।

कर्मचारी भविष्य निधि संगठन-ईपीएफओ ऊं ई साल मई महीना मांय 20 लाख छह हजार सदस्य जुड़्या। आ अप्रैल 2018 मांय पे-रोल डेटा ट्रैकिंग सरू व्ह्यां पाछे हाल ताई री बत्ती बधोतरी है। श्रम अर रोजगार मंत्रालय रे मुजब नुवा सदस्यां मांय 2 लाख 62 हजार महिलावां अर 18 ऊं 25 साल उम्र रा 5 लाख 60 हजार सदस्य शामिल है। आ तादाद अप्रैल 2025 री तुलना मांय 4 दशमलव सात-नौ फीसदी री बधोतरी है। श्रम अर रोजगार मंत्री डॉ. मनसुख मांडविया इण री सराहवणा करता थकां कह्यो के आ उपलब्धि देश रा औपचारिक रोजगार परिदृश्य री बढ़ती ताकत रो प्रमाण है।

खान विभाग चालू माली साल मांय हाल ताई करीब अढ़ाई हजार करोड़ रुपया री आमदनी हासिल कीनी है। आ लारला माली साल री इण ई मियाद री तुलना मांय करीब सवा सौ करोड़ रुपया बत्ती है। खान विभाग रा प्रमुख सचिव टी. रविकांत आज अहलकारां सागे वर्चुअल तरीका ऊं राख्यी ज्यी मीटिंग रे दौरान आ जाणकारी दीनी।

जयपुर ने दुनिया मांय सैर-सपाटा री पांच बेहतरीन ठौड़ां मांय शामिल करी ज्यो है। अन्तर्राष्ट्रीय ट्रेवल मैगजीन री ओर ऊं जारी लिस्ट मांय जयपुर ने ई ठौड़ मिली है। ई उपलब्धि ऊं राज्य सरकार री कोशिशों ने दुनिया भर मांय मान्यता मिली है।

कोटपूतली-बहरोड़ मांय गंभीर बीमारियां रा मरीजां ने रहवास माथे ई देख-भाल रो सुबीतो मिलेला। जिला कलेक्टर प्रियंका गोस्वामी आज होम बेस्ड पैलिएटिव केयर वाहिनी ने हरी झंडी बता र रवाना

कीनी। सीएमएचओ डॉ. आशीष सिंह शेखावत बतायो के आ सेवा मोबाइल यूनिट रे मार्फत दी जावेला। इण मांय मरीजां री देखभाल सारु जरूरी साज-ओ-सामान सागे डॉक्टर, नर्सिंग स्टाफ अर स्वास्थ्य कर्मी तैनात रहवेला।

करगिल विजय दिवस सप्ताह रा तैत प्रदेश मांय ई भांत भांत रा कार्यक्रम राख्या जा रह्या है। आज बाड़मेर मांय शहीदां री याद मांय पौधा रोपी ज्या। हर साल 26 जुलाई ने शौर्य दिवस मनाया जावे है। ई रा तैत करगिल युद्ध रा जांबाज योद्धावां री बहादुरी अर बलिदान ने याद कर्यो जावे है।

प्रदेश मांय ई चौमासा मांय घणखर ठौड़ां सामान्य ऊं बत्ती बिरखा व्ही है। हाल ताई 36 जिलां मांय असामान्य अर पांच जिलां मांय सामान्य ऊं बत्तो पाणी बरस्यो है। ई सागे ई तळावां, बंधां, कूड़ा-बावड़ियां अर नदी-नाळा मांय ई बूता रो 68 फीसदी ऊं बत्तो पाणी भर ग्यो है। 693 मांय ऊं 176 बंधा पूरा भर ग्या है जद के 366 थोड़ा-घणा भर्या है। ई बीचे लारला चौबीस घंटां मांय बिरखा रो जोर थोड़ो कम पड़्यो है। ई बीचे सिरोही जिला मांय आज केई ठौड़ां हल्की बरसात व्ही। आबू रोड़ मांय नदी मांय डूब जावण ऊं दो मोट्यारां री मौत व्हे ग्यी। मौसम विभाग आज जोधपुर संभाग रा कुछ हलकां मांय हल्की ऊं मझला दर्जा री बिरखा रा आसार जताया है। चित्तौड़गढ़, प्रतापगढ़, बांसवाड़ा, डूंगरपुर अर उदयपुर जिलां मांय बरसात रो येलो अलर्ट जारी करी ज्यो है। ई बीचे प्रदेश मांय लारला दिनां व्ही भारी बारिश पाछे न्यारी-न्यारी ठौड़ां पाणी भरण री समस्या पैदा व्हे ग्यी है जिण ने काडबा सारु प्रशासन जरूरी प्रबंध कर रह्यो है। श्रीगंगानगर मांय आज शहर रा खास नाळां री साफ-सफाई रो अभियान सुरु करी ज्यो। नगर परिषद् रा आयुक्त रविन्द्र सिंह यादव बतायो के अभियान रे दौरान नाळां रा बहाव हलका मांय जमी माथे गैर कानूनी कब्जा हटाया जावेला।

सावण महीना रा दूजा सोमवार रे मौके आज प्रदेश रा शिव मिन्दरां मांय संवारे ऊं ई जातरू पूगण लाग्या। हर-हर महादेव रा जयकारां ऊं भक्ति रो वातावरण बण्योड़ो है। मुख्यमंत्री भजन लाल शर्मा ई वां रा रहवास मांय बण्या राज राजेश्वरी मिन्दर मांय जोड़ायत सागे भगवान शिव री पूजा कर र प्रदेश मांय सुख समृद्धि री कामना कीनी। देवस्थान विभाग कानी ऊं सेवा कर्या जावण वाळा मिन्दरां मांय रूद्राभिषेक रा आयोजन राख्यी ज्या। न्यारी-न्यारी ठौड़ां कावड़ यात्रावां ई निकाळी ज्यी। बारां जिला रा अन्ता मांय नागदा शिव मिन्दर ऊं कावड़ यात्रा निकाळी ज्यी। बाड़मेर रा हरपालेश्वर महादेव मिन्दर, चौहटन रा कपालेश्वर महादेव मिन्दर, जसदेर धाम अर दूजा शिव मिन्दरां मांय भक्तां री लेणां निजर आयी।

इन्टरनेशनल चैस फ़ैडरेशन एफआईडीई 2025 रा मुकाबला भारत मांय 30 अक्टूबर ऊं 27 नवम्बर बीचे खेल्या जावेला। इण मांय 206 खिलाड़ी सिरकत करेला। नॉक आउट तरीकां ऊं खेल्या जावण वाळा ई टूर्नामेंट मांय हर राउण्ड मांय शिकस्त खावण वाळो खिलाड़ी बाहर व्हे जावेला। टूर्नामेंट रा पहला तीन अव्वल खिलाड़ी 2026 री होड़ मांय खेलण री काबिलियत हासिल करेला। भारत मांय शतरंज री विश्व कप होड़ साल 2002 मांय व्ही ही जिण मांय नामी ग्रेण्ड मास्टर विश्वनाथन आनन्द खिताब जीत्यो हो।

राजस्थान पुलिस साइबर दगाबाजी ऊं बचाव सारु एक खास एडवाइज़री जारी कीनी है। पुलिस री साइबर काइम शाखा रे मुजब साइबर ठग सी.बी.आई. अर ई.डी. रा अहलकार बण र लोगां ने लूटण रा नुवा तरीका काम ले रह्या है। साइबर अपराधां माथे काबू करण रो काम देख रह्या एस.पी शान्तनु कुमार सिंह बतायो के साइबर अपराधी वर्दी अर फर्जी वारंट बता र धमकावे है। वे डिजिटल अरेस्ट अर एड़ा धमकी भर्या वीडियो कॉल ऊं सावचेत रहवण अर किण ई री धमकी परां खातां मांय रकम नी भेजण री अरज कीनी। श्री शान्तनु कुमार ऐड़ो व्हेवण परां तुरत साइबर हैल्प लाइन नम्बर 1930 माथे फोन करण बाबत् ई कह्यो।
